

**Perkarangan KPKK Meriah Dengan Kehadiran Najib Ceriakan Dikir Bernama
26 Mei, 2012**

PUTRAJAYA, 26 Mei (Bernama) -- Suasana perkarangan bangunan Kementerian Penerangan Komunikasi dan Kebudayaan (KPKK) di sini bertambah ceria dan meriah apabila acara dikir seribu yang ditampilkan sempena Himpunan Jutaan Belia turut disertai oleh Perdana Menteri Datuk Seri Najib Tun Razak dan isteri Datin Seri Rosmah Mansor.

Turut bertepuk tangan memeriahkan persembahan para belia itu ialah beberapa Menteri kabinet seperti Menteri Penerangan Komunikasi dan Kebudayaan Datuk Seri Rais Yatim, Menteri Belia dan Sukan Datuk Seri Shabery Cheek, Menteri Dalam Negeri Datuk Seri Hishammuddin Tun Hussein, Menteri Pertahanan Datuk Seri Dr Ahmad Zahid Hamidi, Menteri Kemajuan Luar Bandar dan Wilayah Datuk Seri Mohd Shafie Apdal, dan Menteri di Jabatan Perdana Menteri Tan Sri Dr Koh Tsu Koon, serta Presiden MCA Datuk Seri Dr Chua Soi Lek.

Perdana Menteri kemudiannya diiringi Hishammuddin melancarkan Skwad Muda KDN, yang diwujudkan khusus untuk menyediakan pelbagai aktiviti buat golongan belia, yang pada masa yang sama meniup api semangat patriotisme di sanubari mereka.

Najib kemudiannya sempat mengunjungi puluhan khemah pameran dan jualan yang didirikan di sekeliling kawasan sekitar, dan beramah mesra dengan orang ramai.

Di segmen berikutnya pula Najib dipertontonkan dengan demonstrasi operasi menyelamat tebusan yang penuh aksi dan debaran, dipersembahkan oleh pasukan khas Angkatan Tentera Malaysia.

Terdahulu, iringan muzik Bhangra rancak menambah keceriaan dan memeriahkan lagi suasana sekitar kawasan Little India Street di sini, menyambut ketibaan Perdana Menteri dan isteri.

Di segmen ini, Najib dengan diiringi Menteri di Jabatan Perdana Menteri yang juga Presiden MIC Datuk Seri G.Palanivel, menyalakan lampu pelita Kuttvilaku- sejenis lampu pelita kaum India yang dinyalakan di majlis-majlis kebudayaan, sebagai tanda perasmian.

Little India Street menampilkan pameran produk, makanan, kesenian dan kebudayaan kaum India.

Perdana Menteri dan isteri kemudiannya mengunjungi segmen Chinese Youth Cultural Village, yang menyajikan pameran serta pertunjukan kesenian dan kebudayaan masyarakat Cina, dan ketibaan mereka disambut dengan tarian singa.

Beliau turut diberi peluang memalu Gendang Cina 24 musim.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=668877>